

Directiva y comision especial a keda eligi Accionistanan di Gold Mill kier asistencia financiero

Reunion e siman aki cu Gobierno y Banco di Inversion

ORANJESTAD(AAN)--Diasabra a tuma luhar e reunion di accionistanan di Gold Mill Paradise. 80 Porciento di e total di accionistanan a acudi na e reunion, cu a desaroya den bon ambiente segun Roland Dijkhoff.

E mensahe principal cu a sali dilanti tabata e hecho cu e ac-

cionistanan a lamenta cu desafortunadamente e proyecto a topa cu hopi contratiempo, cu definitivamente por a worde evita, si e proyecto a haya apoyo real.

Tambe e accionistanan, cu por lo general kier a mira nan mes como hende chikito, a haya cu di nan ta worde spera pa nan

realiza e proyecto den su totalidad sin ningun sosten, mientras cu garantia pa sumanan enorme a worde otorga na companiaman, esta proyectonan turistico.

Nan a papia di e hecho cu e proyecto a worde inicia pa mas di 60 Arubiano y tur estudio, conseho etc., a indica cu e proyecto ta uno factible, cu ta consolida e producto turistico.

Durante e reunion a sali dilanti cu na Augustus 1987 un peticion a worde haci na Gobierno pa haya un carta di garantia o sosten financiero di un forma o otro. A worde sugeri di parti di Gobierno pa e proyecto worde financia pa Investment Bank. E banco na su turno lo kier a financia e proyecto, cu e condicion cu Gobierno lo mester mantene e Jardin Botanico, mientras cu mester traha un caminda adecua pa busnan por yega na e sitio.

E accionistanan ta di opinion, cu a bira tempo pa haya un contesta concreto ariba e hecho si e proyecto por conta cu e sosten priminti y si esey no ta asina Pueblo lo mester mira si tin espacio pa hende chikito por desaroya su mes na forma

sano a base di oportunidad igual pa tur hende.

En espera di e resultado di un reunion cu Ministronan concerni y Investment Bank, a worde dicidi pa accionistanan pa inicia negociacionnan cu gruponan mas potencial cu tin interes den e proyecto.

A eligi un directiva cu ta bay

continua oficialmente e negociacionnan. E ta consisti di roland Dijkhoff, Adelbert Angela y Casper Rasmijn.

Un comision especial a worde institui. E ta consisti di Charles Croes, Virgilio Davelaar, Mario Rojas, Isidro Henriquez, Gilberto Maduro y Raymundo Wouters.